

REGIONAL NEWS

HEADLINES:-

1. Chief Minister Pu Lalduhoma kaihhruaia vawiina Lungleia Council of Ministers thukhawm chuan AMC-a Corporator te leh LMC-Councillor te hlawh a let thum aia tama pun an remti.
2. Tukina Aizawl Zembawk High School venga lei tawlhin a chhilh a thi, mi 3 ruang lakchhuah kim a ni tawh.
3. Vawiin Lok Sabha thutkhawmah President Draupadi Murmu-i thusawi chungchanga lawmthu sawina motion sawi chhunzawm a ni.
4. Brazil tuilian leh leimin avangin mi 179 an thi tawh a, mi 33 chin hriat lohian an bo.

<><><>

CABINET MEETING

Chief Minister Pu Lalduhoma kaihhruaia vawiina Lunglei HPC Conference Hall-a Council of Ministers thukhawm chuan Aizawl Municipal Corporation-a Corporator te leh Lunglei Municipal Council-Councillor te hlawh a let thum aia tama pun an remti.

Council of Ministers thukhawm hian thu ngaihtuah tur chhawpchhuah hrang hrang 5 an pawm a, heng zingah hian Aizawl Municipal Corporation leh Lunglei Municipal Council-a Corporator leh Councillor te hlawh tihsan rawtna hi an pawm a, Home Minister Pu K Sapdanga hnen atanga thudawn danin, AMC leh LMC-a Corporator leh Councillor te hlawh punna hi a sang hle a ni.

Aizawl Municipal-a Corporator te hian cheng sing 2 sang 3500 an hlawh thin a, hlawh tihsan rawtna vawiina an pawm tak hi Mayor hlawh atan sing 7 sang 8, Deputy Mayor hlawh atan sing 7 sang 2, leh Executive Corporator hlawh atan sing 5 sang 5 leh Corporator hlawh atan sing 5 a ni a, Lunglei Municipal Council Chairman hlawh atan sing 7 sang 4400 an pawm a, Vice Chairman hlawh atan sing 6 sang 8400, Executive Councillor sing 5 sang 2 leh Councillor hlawh atana sing 4 sang 7 a ni.

Council of Minister thukhawm hian Finance Department atanga lut Proposal for introduction of the Mizoram Banning of Unregulated Deposits Scheme Rules, 2024 chu a pawm a, PHE atanga lut pahnih The draft Mizoram Ground Water (Control & Regulation) Rules, 2024 leh Proposal for amendment of the Mizoram Water Supplies (Control) Rules, 2023 te chu pawm a ni a, heng bakah hian The Mizoram Wood Based Industries (Establishment & Regulation) (Amendment) Rules, 2024 EF&CC Department atanga lut chu pawm a ni bawk.

Tun tum hi Lunglei khawpuia Council of Ministers thutkhawm nghah tum 1-na a ni a, Rorelna an tan hmain Chief Minister Pu Lalduhoma chuan, Lunglei mipuite lakah Tha ba an ngah hle tih a sawi a, an sawrkar chuan Lunglei khawpui chu an ngaihthah dawn lohzia tihlanna hmasa atan Council of Ministers meeting chu an nghat tih a sawi a ni.

<><><>

LANDSLIDE KILLS 3

Tukin dar 6 rik hma deuha Aizawl Zembawk High School venga lei tawlh chuan Pu F. Lalrokima in a chhilh a, mi 3 an thi a, an ruang hi lakchhuah kim a ni tawh.

Tukina lei tawlh hian Pu F. Lalrokima fapa te nupa, Isaac Chhangte, kum 32 leh Lalrinchhani kum 25 te leh an fanu Abigail Lalchhanhimi, kum 4 mi te a chhilh a, an ruang hi chawhma dar 11 vel khan lak chhuah kim a ni.

Chhياتna a thlen lai hian Pu F. Lalrokima leh a nupui Pi Lalremruati leh an fate nen an vaiin mi 8 an awm a, vanneihthlak takin mi 5 te chu an him a ni.

Chhياتna thlenna hmun hi, DC, Geology and Mining, DM&R, AMC leh Zemabawk Local Council chuan a huhovin an en nghal a ni.

Tunlaia Mizorama khaw cheng avangin inkalpawhna kawng leh leimin hmun hrang hrangah a thleng a, tukin vek khan Zuangtui Veng, Aizawlah leiminin chenna in pathum chhungkaw pali luah lai a hnawl a, thi leh hliam an awm lo hlauh.

Thudawn danin chenna in a hnawl hmasak bera cheng chhungkaw hnih chu nizan atang khan an riak chhuak a; a dawttua chengte chu an riah chhuahna a rei deuh tawh a; a hnawl hnuhnun bera chengte chu nizan khan riak mah se an insaseng hman a, an insasengna lamah hian an fanuin hliam na lutuk lo a tuar a ni.

Mamit Hmarveng huamchhunga Vengtharah tunhnai atang khan Lei a tlahniam a hei vang hian In dinglai 3 chu dinhmun hlauhawmah a din avangin zan lamah an riak chhuak a ni. Heng inte hi concrete building vek a ni.

Lei tlahniam avang hian Pu H. Thanmawia In luah lai bula an mahni in Assam Type chu karhmasa lam khan a luahtu a inthiarchhuak tawh a, tun inrinni khan In hi thiah a ni tawh bawk a ni.

Helai hmun hi kawngnhuai lamah a lei a min reng avangin a chunglama In hi a tlahniam zel nia hriat a ni a. Nizana ruahsur nasa avangin lei hi a min nasat avangin helai hmuna chengte tan hian a him lo hle a hriat a ni. Hmarveng VC te chuan helai hmun hi an ngaihven reng a a dinhmun a zirin DC Mamit leh DM&R lamah report pe in an hriattir zel a, silpauline pawh an mamawh ang an ngaihtuahpui zel bawk a ni.

Helai hmuna chengte chuan an kawmthlang lama PWD kawng laih vangin a min zel a, chu chuan an in vel hi a tlakhniam phah zel niin an ngai a tih kan corr an hrilh a ni.

<><><>

BJP WINS MADC MDC BY ELECTION

Mara Autonomous District Council (MADC) sorkar hnuai Chakhei bial Member of District Council (MDC) seat ruak hnawh khah nana by-election ah BJP in seat an la a.

Thla hlui June ni 28-a by-election vote tla te chu vawiin chawhma dar 10 khan DRDO Conference Room, Siahaah chhiarin, tluang taka chhiar zawh a ni.

Vote hi Siaha District Election Officer leh tun tum inthlana Returning Officer ni kawp Pu VL Hruaizela Khiangte kaihhruaiin chhiar a ni a; Chakhei MDC bial by-election-ah hian vote awm zawng zawng 1,875 atangin Electronic Voting Machine-ah vote 1592 a tla a, hei hi za zelah 84.91 a ni.

Tluang taka vote chhiar zawh a nih hnuah Returning Officer chuan vote 733 hmutu, Bharatiya Janata Party (BJP) candidate Pu Albert TT Sachu chu Chakhei bial MDC thar atan thlan tlin a ni tih puangin, thlan tlin a nihna certificate a hlan nghal a ni.

Pu Albert TT Sachu hian amah hnaih bertu ZPM Candidate Pu T. Essa chu vote 43-in a hneh a ni.

<><><>

YLA

Lawngtlai District Bualpui Ng a Young Lai Association Sub Hqrs. Bualpui Ng hruaitute leh Police duty ten Siaha District a phurhluhtur Diesel Barel 57 tukin khan an man.

Myanmar Rakhine State a Tuialhthei phurhluh thin chu Central Young Lai Association chuan June 24 atang khan helam khawih thinte chu tawpsan tura ngenin, Lawngtlai District chhunga hmun pawimawh zuala ah duty an indah zui a, Bualpui Ng a duty te hian Diesel Barel 57, Litres 12,312 Pick up truck paruk hmanga Lungpuk, Myanmar ramri, Siaha District a kalpui tur ni a sawi chu manin, Inruak remchang ah an dahtha a. YLA Sub Hqrs Bualpui Ng hruaituten sawidanin heng Diesel te hi Aizawl atanga rawn phurh a ni.

Rakhine State a Oil phurhluh thin tihtawp chungchangah Lawngtlai a Akashvani corr Lalnggheta Ralte zawhna chhangin Central YLA General Secretary Pu Joseph Lalhmingthanga Chinzah chuan chhimlam District pathum a DC leh DCSO ten khapna thuchhuah an siam hnu ah phalna mumal nei lova Rakhine State a Oil thawnluh a nasat thu leh Central YLA chuan a ngaimawh thu sawiin, Rakhine State a Helho chu Myanmar a tlangmi, Chin unaute tana hnawksak tak an nih vangin, kan unaunaute do nan Rakhine State a an mamawh thawnluh chu thil tihawma an ngaihloh vanga khap an nih thu a sawi.

<><><>

NQAS

Ramchhunga sawrkar Damdawiin tha bik thlanchhuah zingah Haulawng Primary Health Centre leh Chawlhhmun Urban Primary Health Centre te telh an ni a.

Sawrkar damdawiin tha bik tehna National Quality Assurance Standard (NQAS)-ah heng damdawiin pahnih te hi an tling a. Damdawiin tha a tling tur hian State level leh National Level atangin tehna hrang hrang paltingin Haulawng Primary Health Centre hian zaa 90.6 hmuin Premium ah an tling a, Chawlhhmun Urban Primary Health Centre hian zaa 87.9 a hmu bawk. Damdawiin tha tehna-ah hian tehna hrang hrang 2000 chuang a awm a ni.

Mizoram-ah hian Civil Hospital Aizawl, Aibawk Primary Health Centre, Thingsulthliah Primary Health Centre leh ITI Urban Primary Health Centre te hi damdawiin tha a thlan an lo ni tawh bawk a ni.

National Health Mission Mission Director Dr. Eric Zomawia chuan ramchhunga damdawiin tha bik a thlanchhuah an neih belh zel chu Mizoram tan mellung pawimawh tak a nih thu sawiin hemi kawnga thawktu zawng zawng te chhuanawm a tiin an thawhrimna leh taimakna-ah lawmthu a sawi.

<><><>

LOK SABHA

Vawiin Lok Sabha thutkhawmah President Draupadi Murmu-i thusawi chungchanga lawmthu sawina motion sawi chhonzawm a ni a. Prime Minister Narendra Modia chuan a sawrkar chuan India dah hmasak ber chu a policy anih thu sawiin eirukna lakah ngaihnamna an nei lo a ti a. Hei hian inthlan neih zawh takah khan mipui thlawpna a pek phah a ni a ti. Pu Modia chuan a sawrkar chuan mitin tana roelna pek chu a tum ber a ni a ti a. Opposition te chungchang sawilangin thudik lo tam tak an thehdarh chungin Lok Sabha inthlanah an chak zo lo a ni a ti. Samajwadi Party hruaitu Akhilesh Yadav chuan Lok Sabha ah thusawiin tun sawrkar chuan sawrkarna siam tura mamawh zat an nei tling lo tih sawiin hei hi INDIA Alliance te hlawhtlinna a ni a ti a. Hei bakah hian Pu Yadav-a chuan ramchhung eibar dinhmun sawilangin khawvela economy lian pangana ni chungin percapita income erawh a hniam a ti.

<><><>

BRAZIL FLOOD

Brazil tuilian leh leimin avangin mi 179 an thi tawh a, mi 33 chin hriat lohin an bo. Vanduaina thlenna hmun hi Brazil chhim lam state Rio Grande do Sul ah a ni a. State civil defence agency chuan state pum zaa 90 chu tuilian leh leimin vanga chhian hian a nghawng a ni. Thla hnih chungin sik leh sa inthlak nasa lutuk avanga chhian thleng hian mi maktaduai 2.39 chuang a tibuai a. Mi nuai 4 sing 5 chuang hmun him lamah thiarchhuah tawh an ni.

Rio Grande do Sul hi lonei leh ranvulha eizawng tamna a ni a. Argentina leh Uruguay ramria awm niin mi sing 8 leh sang 9 chaung leh ranvulh sing khat leh sang 5 chuang sipai leh tualchung michhanchhuah hna thawk tura inpe ten an chhanchhuak tawh a ni.

<><><>